

April  
2019



# KRISTIAN THALAI



Vol. IX No. 14

Kristian Thalai Pawl Chanchinbu thla tin chhuak

HRINGLANG TLANG pg.29 KANTU pg.27 NGAIHNAWM NGAIHAWM pg.23 EDITORIAL pg.2  
HRISELNA pg.14 WORK CAMP pg.10 HRUAITUTE CHANCHIN pg.18 KEIMAHNI pg.30

ROREL INKHAWM REPORT / AN CHANCHIN - DARLENE ZSCHECH

## I RAWNGBAWLNA KHA HLEN RAWH

*Joseph Zaihmingshanga*

MENTOR THA BER  
Laldinpuia Tlau

YOU SAY IT BEST  
Sarah Lalrinsangi

TUNGE TLINGZO  
H. Lalrosanga

SAVA TÊ PAKHAT  
JACOB LALAWMPUIA



**KTP HNATLANG**

**balu la**

**meihawl rawh**

**lung la**

**lung rem**

**Slab chhung**

**Slab chhung**

**Tumbu la**

**Lungleng Bial KTP Workcamp @ Bhairabkunda & Sapangaon**

## Kristian Ṭhalai Pawl chanchinbu thla tin chhuak

1970-a chhuah ṭan - Kum 49-na vawi 4-na Chhuah tawh zat : 483

### Editor :

Robert Lalduhzuala

### Joint Editors :

C. Malsawmtluanga  
Lalsiammawia Pachuau  
Malsawmtluanga  
K.Lalchhanhima

### Manager:

Lalrinchhana Ralte

### A lak man :

Kum khatah - ₹ 80.00  
Copy khat - ₹ 7.00

*Thu chhuah tūr nei chuan Editor,  
Kristian Ṭhalai, Synod Office-ah thawon  
tūr a ni a; a la duh chuan KṬP Office-ah a  
man pēk lāwk a ngai.*

Office Phone : 8794796008

### E-Mail :

[kristianthalai1970@gmail.com](mailto:kristianthalai1970@gmail.com)  
[centralktp@gmail.com](mailto:centralktp@gmail.com)

## KRISTIAN ṬHALAI PAWL

### Thupui

Rawngbawl tūra chhandam

### Thupui inngahna

Ephesi 2:10 Thil ṭha ti atán  
Krista Isuaah chuan siama awmin,  
ama kutchhuak kan ni si a, chu thil  
ṭha tih chu kan awmna tūrín  
Pathianin a buatsaih lāwk a ni.

### Thiltumte

1. Isua Krista rinna leh amah anna  
kawnga ṭhalaité hruai.
2. Kohhran kut ke ni tura ṭhalaité  
buatsaih.
3. Kohhran hnathawh tihpuitlin.
4. Krista Chanchin Ṭha puan  
darh.

## A CHHUNGA THU AWM TE

1. Editorial	2
2. Sermon - <i>I rawngbawlna kha hlen rawh</i>	3
3. Thalaite suangtuahna- <i>Savate pakhat</i>	5
4. Mentor tha ber- <i>Laldinpuia Tlau</i>	7
5. Work Camp - <i>Bairakunda leh Sapangaon fehchhuah</i>	10
6. An chanchin - <i>Darlene Zschech</i>	12
7. Hriselna- <i>Rannung seh</i>	14
8. Hruaitute Chanchin- <i>T.Upa David Lalhmachhuana</i>	18
9. Article - <i>Tunge tlingzo</i>	20
10. Ngaihawn Ngaihawm- <i>Darthlalang</i>	23
11. Rorel Inkhawm Report	24
12. Kantu - <i>College Veng- Kolasib</i>	27
13. Hringlangtlang - <i>College Test</i>	29
14. Keimahni	30



## KAL DAN NGAI HI!

*Hman lai hian Russian Lal, Tzar ho lal in kawt tual char hmun pakhtah hian vengtu (sipai) hi an duty nitin thin a. An hunbi tiamah duty te chu an inthlak zat zat a, an duty inthlak te chu an puithuin, an inkhengkhawng nalh thin hle a ni.*

*Hun a lo kal zel a, chulai tualchara sipai duty chu enge a tangkaina, enge an thawh ber tih chu zawhna a lo awm ta a. An han chhuikir ta a. Kum tam tak kalta khan chulai tualah chuan Lalnu hian pangpar huan a nei thin a lo ni a. Chu chu mi te tih chhiat hlauin vengtu a dah a, Lalnu thih hnu, pangpar pawh awm tawh loh hnu kum tam tak ral hnuah pawh vengtu an lo la indah chhun zawm zel a lo ni a. Chulai tualchara duty pawh chu an titawp zui ta a.*


*Kohhran leh KTP pawh hi han inen ta ila. Hman laia tha, mahse tunlaia tangkai vak tawh si lo hi thil tam tak a awm thei awm e. Tun laiah mi kan buai em em a, hun lah a hlu tawh em em bawh a, chuwang chuan kan Pathian rawngbawlnaah hian Duty chuangtlai kan insiam ang tih hi a hlauhawm tak zet. Kan thiltih leh thawhah hian kan rawngbawl chhan Pathian a lawm si loh chuan awmzia a awm dawn lo a ni.*

*Kan biak Pathian hi, hmanlai (classic) ruiah, thil thar pawm harsa ti zet anga kan ngaih chhung chuan, kan Kohhran leh KTP hi a hniam hret hret ang. Pathian hi a thilsiam leh ruahmanna atang pawh hian mi fing leh min hmakhalh hneh lutukTu a ni tih a hriat a. Amah zuitu ramte pawh khawwela ram changkang leh hmasawn an ni zel a. Chuwang chuan Pathian hian hmasawn leh changkang turin min duh a ni.*

*Committee hi 'A thlarau lai tak' kan ti na chungin, Committee member tam zawkte chu Agenda zir chiang peih lo leh rilru hmanglo tak kan nih chuan hmasawna leh thanna daltu kan ni ve thei tlat a ni. Hmasawn kan duh luatah thil thar kan zuan lutuk angtih chu a hlauhawm. Amaherawh chu rawtna leh thil thar kan ngaihtuahin, kan hriatphak loh leh duh loh zawng a nih awanga, 'kan kal dan ngai hi a tha' tih fo hi a fuh ber lo awm e.*

*C. Malsawmtluanga*





**I RAWNGBAWLNA KHA  
HLEN RAWH!**

*Joseph Zaihmingthanga,  
Synod Revival Speaker*

II Timothea 4 : 5 ah chuan “ *Nang erawh chu engkimah finkhur la, hrehawm tuar la, Chanchin Tha hriltu lam hna thawk la, i rawngbawlna kha hlen rawh*” ti a tirhkoh Paula’n Timothea a fuihna ÷awngkam lungkuai zet mai kan hmu a. He fuihna thu, mi cho tak hi keini nungdama la awm te tan pawh hian, a hlut dan leh a dikna a la danglam chuang awm lo e. ÷hangthar te khawvelah hian he thu hi kan in fuih ve na atan tiin, chhui fiah deuh tum ta ila a ÷ha awm e.

Kan Bible chang tarlan hi ngun taka kan en chuan zawhna, langsar tak awm chu, engatinge “*Nang erawh chu*” a tih kher? tih hi a ni awm e. Midangte laka in la hrang emaw, midangte anglo taka che vel tura fuihna a ni tlat mai a, chu tak chu hailan a ÷ul ta a ni.

*‘Zirtirna dik an ngaih peih loh hun a la thleng dawn si a;’*

Kan tun dinhmunah hi chuan a dik viau awm asin! kan nuam tih zawng leh kan phurna lam zawng chauhva Lalpa rawngbawl tum kan pung tial tial niin a hriat a, fekfawn leh urhsun, khun khan leh thupui fun taka in kaihhruaina kan ngaithei lo

tial tial em aw? a tih theih. Kohhran inenkawlina kham khawp lovin, ho hran nei a, mahnia a lan dan ang anga rawngbawl tum tlat chi hi hmuh tur an awm nual awm asin mawle. Tunlai *ministry* ÷henkhatah phei chuan, kohhran serh leh sang pawimawh tak, sakramen thlenga mahni thu a lo ÷heh ta mai pawh an awm ÷an ta.

*‘Zirtirtute an hnenah an khawm zawk a’*

Kristaa kan ÷han lenna tura pawimawh lawt larh, kohhran Lalpa’n min pe a. Chu chu kan hmun thianghlim chu a ni. Kan hmun thianghlim Pathian nung kohhranho duh khawp

lova hmun thianghlim dang siam duhna thlarau reng reng hi a hlauhawm tih hriat a va hun tawh em! Kohhran chu Krista taksa a nih ang ngeiin a lu chu Krista a ni a, chuta kan inkaihhraina anga kal hlei thei lova kan zenawi chan pawm tir tum rana puipate in zui tir ta duan duan lah bo lo. Kohhrana damna a awm ring zo lova mahni chhung kaw bil liau liau dam tuma rawngbawltu koh luh duh zawkna rau pawh hian kohhran a va ti sawt lo em!

*'An bengte chu thutak lamah an chhu ngawng ang a, thawnthu lam panin an peng tawh ang'*

Pathian thutak ngaithla a, Lalpa nena kan in pawlna tura hmun ruat leh serh hran bik, kan biak inah ngei pawh darkar khat inkhawm rei ti ngawih ngawih engzat tak awm ang i maw? Nun chhungril min at a, thinlung tai thler thei khawp Pathian thu hriam tawn te phe chu, *over* kan ti zel tawh mai em? Chuti ang taka Pathian thu hriam tha ai chuan, pawm nuam tak leh kan nuh pui hum hum theih, thu tha tlanglawn ngaihtlak kan chak zawk a ang thin! Thusawi thiam leh sawi mi

kan pung zel a, kohhranho tana Lalpa thuchah sawi lova, ngaithlatute ngaihnaawm tih zawng tur ringawt dap khawma thuhrl ching pawh kan awm mai awm a sin. Thenkhat phe chuan, tawngtai leh Bible-a Lalpa aw ngaihtla lovin, *google* hman tangkai kan tum zawk ta em? *Google* peih deuh chuan *sermon* a nei tha deuh ang a, *google* thatchhe deuh chuan *sermon* a nei phuailuai deuh mai dawn ni awm tak a ni!

Chuti ang taka dazatna leh thatchhiatna te'n a run mek, nun khawih danglam thei thu leh hla ai a, min ti phur thei lam ringawt tui pui zawkna; urhsun leh puithu taka in relbawl ai a, rik hut hut thlakhlehna khawvelah hian kohhranho min dah si a. Thenkhat te'n chuti ang tak chuan hun leh nun lo hman mahse, Paula'n Timothea a fuihna ang hian; keini erawh chuan hrehawm tuar ila, Krista Isua chanchin tha chauh chu kan tuipui ber lo ni sela. Kohhranho thutak ban leh inngahna ni turin, kan rawngbawlna kan hlen a va tul ta em! I rawngbawlna kha hlen rawh. Lalpa'n malsawm rawhse. Amen.



Tuk khat chu kan room-a ka nupui leh ka fanu nen kan thathuma kan awm laiin chawngzawng pakhat hi a rawn thlawk lut hlawl mai a. A tum lohna takah a rawn thlawk lut tih a hriat hle mai. A beisei loh takin Kan lo awm thap bawk nen, thlawh chhuah leh mai tumin a thlawk kual ta zak zak mai a. Ka fanu lah chu sava lawm rual lek a la ni bawk a, lawm avangin a au khek tuarh tuarh mai.

Chutia thawm kan lo neih ve chul avang chuan a hlau hle mai a. A sang thei ang berah thlawkin kan room ceiling velah chuan a fu a, a thlawk kual leh thin a. A rawn thlawh luhna tukverh awmna chu a hniam em mai a, a thlawk hniam ngam tawh si lo.

Rei fe a thlawh kual hnu chuan kan khawngaih ta deuh a. A chhuah theih nan tiin kan room tukverh awm zawng zawng chu kan hawng ta a. Nimahsela a thlawk hniam ngam tlat si lo. Ventilation atanga chhuah tumin a han bei a, darthlang te chu a su leh chawrh thin a. Kan nu chuan, "Aw... han thlawk

hniam deuh ngam la, i tumna chu i puitlin mai tur" a lo ti ve reng bawk a. A tawpah chuan a huaisenna zawng zawng sawm khawmin a rawn thlawk hniam deuh a, a thlawk chhuak ta a.

Ka ngaihtuah zui reuh reuh a, kan nunah hian chu chawngzawng dinhmun ang chu kan tawng ve fo thin. Kan awmna dinhmun aia hniam hretah hian awm ngam thin ta ila kan hlawhtling ni mai thin tur a ni a. Inphahhniam a tul hunah kan inphahhniam phal lovin, kan ngam lova. Kan vela awm te kan venthawn luatah kan hlawhtlin mai loh pah thin.

Kan ngam ang tawkin han inti hniam ve thin mah ila, a nih ang tak a nih loh avangin kan tum kan hlen thei thin lo. Midang nena kan thubuai neih te, kan rawngbawl na kawngah te hian hniam taka kan inphah ngam loh chuan kan tanna ngaihah kan tang reng tho thin a lo ni.

*“You say it best, when you said nothing at all”*

*~Sarah Lalrinsangi, Ramhlun North~*

Vawiin ka taxi chuannaah Ronan Keating sak “You say it best, when you say nothing at all” tih hla hi cartape ah a in play vang vang mai a...a hla hrim hrima hi chu Love song ni mahse, khimi tlar khian ka ngaihtuahna a ti kal thui ta em em mai...kan tawm ang che u...

Mimal tin inchhut chhin ila...nitin mai hian tawngkau engzat nge kan chheh a, vawi engzat nge kan tawng? Kân kâ aţanga chhuak chuan mi lawmzawng nge a sawi tama thu tawngkailo? Kan bula mi te’an an sawi ang apiang kan rilrem zawng ni em em lo mahse kan lo kûr pui chiam thin te, mi titi pawl loh hlaua kan tan emaw midang tan emawa tawngkaina nei miah lo thu kan chhakchhuah hnem thin ziate, mi ngaihtuah chhuah tir a. ‘Tawngkam tha in sial a man’ tih hian Sial tak tak man thin tur ni ta ila, sa hmeh khat fefe chu kan va tam dawm tehlul! -tihte ka ngaihtuah a.

Ni, tawngkam khat lekin mi lawmna a thlen theih laia, tawngkam tha kan ui em em te, mi chanchin tha aia...a chhe zeuh lai kan thur chhuak taima em em te, kan zawm atan nilo, mi zawm atana thu tha kan hre hnem lutuk te, ei loh kan ngah lutuk te, zeldin titi kan ngah lutukte leh kan uang lutukte hian rawngbawltute thawohhona a va ti bawrhbang em!

Ngawi renga kan awm hian thu tha tak sawi kan nih châng alo tam khawp mai. Rinna kawngah pawh natna te, tawrhna te, sawichhiatna te leh elrelna alo thlen a...ngawi renga lo dawngsawng thintu kha kan zui Isua ngei anih kha. “Tawngka chhuak hriat tur awm hauh si lova i thusawi hi a lo thlum tui ber mai...”

Kan tawngchhuah hmaa ngun taka kan ngaihtuaha ngawih chuh a hun a, kan ngawih ngam hi kan chakna tur a lo ni.

*“Beih hmain ngun taka râl râl a tha, Rem i hriat poh leh i chak ang” -Thufingte 24:6*





**P**ublic exam-a topper-te an kawmna hi a ngaihnawm ðhin hle mai. ðhenkhat chuan, krismas leh kumthar ruaithehna hmuna zirilaibu an ken thu te, ruai an ðheh hman hram thu leh a bak zawng chu lehkha zirna atan an hman thu an sawi ðhin. 'Aw thlir zel ila, Bethlehem tlangpui.....' tiin zai dup dup ve lo mah se, Krismas an hmang tha ka ti.

ðhalaite hian mi hlawhtling, kan nun min fuihtu ni thei *mentor* tur kan zawng ðhin, an tumruhna leh hlawhtlinnate chu min fuihtu a tling fo. Chutiang mi ropui entawn tur kan zawn mek lai chuan, kei chuan, a thei apiangte dinchanna khawvelah hian, Isua aia entawn tur ðha hi an awm ka hre lo. Isua anga zirtirtu ðha, tidamtu ropui, thusawi thiam hmingthang leh hruaitu zui tlak hi an awm lo. Chhandamtu a nihna chu sawi loha lum ni se. Amah ringlotute pawhin, 'mi ropui tak pakhat chu a ni' tiin an sawi tho tho.

Rome ram ropui tak tluk chhiat chhan leh, tunlai

khawvela mi ropui min nih tir lotu langsar ber chu *sex* hi a ni. Isua erawh zawng a pian dan reng a fuh e, a nu Mari chuan vantirhkoh hmaah 'Ka la virgin e' a ti ngam a. Bible lahin Isua pian hma chuan Josefa leh Mari te'n nupa nun an hman loh thu a sawi bawka. Sex-a thianghlina hi malsawmna hnar a ni.

Bethlehem hi lei leh van lal ber, Isua pianna atan chuan a tlawm deuh a ni mai thei, hla siamtu chuan 'A pianna tlawm mah se, ka Chhandamtu a ni' a ti kher a. Mahse, khawvela mi ropui leh hlawhtling ni tur hian pianna leh chawrchhuahna ropui kher a lo ngai lo e. Streetlight eng hnuai lehkha zir ðhin Dr.

Manmohan Singh-a chuan *Cambridge* leh *Oxford University*-ah lehkha a zir hnuin India Prime Minister a ni thei a. Mizo IAS tam tak hi, thingtlang mi, a thente chu far fim eng hnuiaia lehkha zir thín an ní. Zu avanga a pain hma taka a thih san, hnathawh thul avanga lehkha pawh zir lo D.L. Moody aia Pathian thuhritu ropui hi an awm bik lo.

Isua chanchin an sawi zinga mawi em em chu 'Pathian leh mihring duhsakin a awm deuh deuh va' tih hi a ni. Pathianin Nebukadnezzara a hrem chhan chu, Chungnungbera chuan mihringte lalna ram chungah thu a nei a, a duhsak apiang a pe thín a ni tih a hriat nan a ni. Pathian duhsakna changtu Solomona hi pheichham man ka ti mai thín. Finna leh hriatna a dil a, pek a nih mai bakah sum leh pai te, hausakna te, chawimawina te pek belh a ni bawk. Zirnaah hlawhtlin kan duh a, hna tha hmuh kan duh a, nupui pasal duhawm tak neih kan duh a. Chung zawng zawng min pe theitu Isua hnenah dil nachang i hria ang u. Mahse, 'hmana Isua kha a ni tawh lo'

i ti thalh mai thei e, Bible chuan, 'Isua Krista chu niminah nen, wawiinah nen, kumkhua pawhin a pangngaiin a awm fo ang' tiin a sawi.

Lar a thaa a, a thaa zawnga mi hriat hlawh nih hi a hlu. Isua chanchin hi kum 12 a nih lai kan hria a, a reh vang vang a, kum 29 vel a nihah kan hre leh chauh. Kum 17 chhungin Isuain eng nge a tih kan hre lo. Hemi hun chhung khaikhawmna ang deuh kan hriat chu, 'Isua chu a fing deuh deuh va, a lo lian telh telh a' tih a ni. Lian telh telh tura infuih a ngai lo mai thei. Fing deuh deuh tura mi hriat loha inzir chet chet hi kan zir thar a tul. Mi hriat nih thuai thuai kan tum hi kan chhiat pui thei. Isua anga hun biru thaa tak nei te'n lar hun an nei chawk.

Hlawhtling tur chuan phur hluai a tawk lo a, tum thlen a ngai. Pathian thu pawh hi thapui chiama tawpho chuan chatuan nunna an chang lo thei. An pasalte nu Naomi an thlah dawn khan, Orpi leh Ruthi kha an thap chiam a; mahse, Bethlehem thlenga kal ve lo Orpi chanchin hriat zui a ni

ve ta lo. Berampute pawhin inlarna mak tak an dawn hnuin, rau ruaiin an awm mai mai lo a, Bethlehem thlengin an kal a, ran chaw pekna thlenga nausen mu an hmu a ni. A tum ber hlen chhuakin Isua pawhin, ama Kraws pu

chungin Kalvari tlang thlengin a kal a nih kha. 'Aw, Bethlehem tlang ka thlen hma chuan, chaw lovin ka kal ang' titu te'n Bethlehem an thleng angin i 'goal/aim in life' i thlen hma zawng i kal tauh tauh chuan thlen hun i la nei ngei ngei ang.

### March 2018 – February 2019 chungna Kristian Thalai Pawl report tlangpui

1. Bial awm zat	: 206
2. Branch awm zat	: 864
3. Member mipa zat	: 93,542
4. Member hmeichhe zat	: 57,741
5. Member zawng zawng	: 1,51,283
6. Inkhawm chawhruai	: 33744 (22.31%)
7. Inkhawm tha ber bial	: Shillong (54.51%)
8. Member tam ber bial	: Ramhlun North (2308)
9. Member tlem ber bial	: Buarpui (42)
10. Member thi zat	: Mipa - 428 : Hmeichhia - 42 : Total - 470
11. Member Innei zat	: Biak Inah - 1538 : Hmun dangah - 2003 : Total - 3541
12. Kristian Thalai la zat	: 40,500
13. Kristian Thalai la tam ber bial	: Republic Veng (1016)
14. Bial&Branch Missionary chawm zat	: 3426
15. Missionary chawm tam ber bial	: Dawrupi Vengthar (8)
16. Missionary chhuak tam ber bial	: Ramhlun North (24)
17. Missionary chhuak thar tam ber bial	: Chanmari W (6)



## *Bairakunda leh Sapangaon fehchhuah*

*Jr. Hlangthangmawia,  
Lungleng -1 Pastor Bial*

**L**ungleng-I Pastor bial KṮP Conference vawi 12-na chuan bial hminga work camp Jarkhan Mission field-ah neih ni se a ti a. Amaherawhchu, Jarkhan lama thawktu te'n harsatna a awm thu kan Pastor P.B. Zosaphara an rawn hrilh a, chu chu ngaihtuah tha leh in, Bairakunda leh Sapangaon-ah work camp neih a ni ta zawk a ni.

Lungleng-I Pastor bial Hlimen pastor bialah hun rei tak awm in, kum 2007 Synod inkhawmpuiah khan Lungleng-I pastor bial hi alo piang ta a ni. Work Camp hi bial hminga tum hnih neihna a ni nghe nghe a, kum 2015 khan Salem boarding-ah neih a ni tawh baw. Kan bialah hian Branch pathum kan awm a-Samtlang, N.Lungleng leh Lungleng-I branch-te kan ni. Bial naupangtê, member thahnemlo tak ni mah ila, kan inlungrualna leh kan thawhhona a tha thin hle.

October 29, 2018  
thawhtanni zing dar11-ah  
Aizawl atangin nigth bus in  
kan chhuaka, thawhlejni zing

dar 6 ah Guwahati kan thlenga, thawktu missionary Pu.L.k.a'n minlo hmuak a, Guwahati-ah hian zing chaw kan ei a, chumi hnu zing dar 11 velah work Camp neihna hmun tur panin Bus in kan chhuak leh a, tichuan tlai dar 5 velah Bairakunda hmun chu kan thleng ta a ni. Thawktu missionary te'n minlo hmuak in, thingpui tuihnai tak minlo hlui a, quarters pakhtah min luhkhawm tir a, thawktu zinga mi pakhatin tawngtaina hmangin, chumi zawh chuan zanriah eina turah min semdarh ta ani.

Kan thlen tuk zingkar atangin hna kan tan nghal a, member kalte chu hmun



hnihah in thenin, Bairakunda leh Sapangaon-ah hna hi thawh a ni. Bairakunda-ah kohhran hall sak hna thawh a ni. Hall hi adung ft 60 avang ft 40 vel a zau a ni a, a chhuat rual remlo lai leh khuar laite hnawh mam hmasain, chumi hnuah a chhuat hi concrete in kan chung a, cement pawh bag 60 chuang lai kan hmangzo hial. Sapangaon lamah hian an biak in compound bang brick in kan hung a, kel leh bawng an luh thin mai bakah ramria buaina awm thei te avangin bang hung hna hi thawh a ni. Thawhlehi aṅanga thawk ṅanin Inrinni tlai dar 3 velah kan hna hi kan zo thei ta a ni.

Kan hna thawh danah kan missionary-te mit kan tlung hlein kan hria a, tumah zelthel bik awm miah lova hna kan thawk mawlh mawlh min hmu chu kan missionary te pawhin min fak ve hle.

Pathianni chamin, an inkhawmte kan chhim a, tisa leh thlarauah kan hlawk hle. An inkhawmah hian thusawihna chanvo hlu tak nei turin min sawm a, mi pali inthlangchhuakin thu kan sawi a, min duhsakna hi a

ropui kan ti a, kan lawm tak zet a ni.

Kan missionary te inpekna a tak ngei a han hmuh chuan rilru a khawih takzet a, ramthar rawng bawlnaah inpek nasat aṅul ziate, rawngbawlna kawnga hmasawn a ṅul ziate hrechhuak tharin, tisa leh thlarauah hlawkna nasa tak kan chharchhuak a, a lawmawm kan ti hle a ni.

Khamlo taka thawktu missionary-te nen hun kan hman mek lain, kan innel dawn chauhva kan haw a lo ṅul ta si a. Thawhṅanni zing a rawn herchhuak a, kan zing thingpui tur kan missionary te'n minlo lum sak diam a, kan in zawhin, kan missionary-te aṅangin tawngṅaina hun an hmanga, tichuan in ngaitak chungin kan in mangṅa ta a ni.

Zing dar 5 velah chhuakin, kan haw kawngah harsatna lian tham tawk lovin, thawhlehi, November 4, 2018 tlai dar 3 vel khan kan rawn thleng leh ta a ni. Kan kal chung zawnga min hruaitu kan Pathian chungah lawmthu awm rawh se.



**An  
Chanchin**

**Darlene Zschech**

*'My Jesus, my Saviour  
Lord there is none like  
You  
All of my days I want to  
praise  
The wonders of Your  
mighty love  
My comfort, my shelter  
Tower of refuge and  
strength.....'*



**H**e hla lar tak mai ,  
Hillsong Music  
Australia kaltlanga lo  
lar chhuak hi a sa lar tu  
leh a phuahtu chu  
Darlene Zschech  
(check tia lam tur) a ni a.  
Kum 1993 khan a phuah a ni.  
Zaithiam thahnem tak - Don  
Moen, Carman, Natalie  
Grant, Skillet, Matt  
Redman, Jim Brickman,  
Randy Travis, Lincoln  
Brewster, John Tesh leh Sandi  
Patty te pawhin an lo sa tawh  
a. Tawng chi hrang hrang  
sawmhni (20) laia lehlin a ni  
tawh nghe nghe a ni.

April Ni 9, 2018 khan  
American Idol show lar tak  
chuan "Idol Gives Back" ah

top 8 té'n show tawpa an hla  
sak ho atan he praise and  
worship hla lar tak hi an lo  
hmang tawh a. A hla thu  
erawh tidanglamin tlar tir  
bera "Jesus" chu "Shepherd"  
ah a hla siamtu rawn lovin  
an thlak a. A tukleh zanah  
erawh chuan publisher te  
ngenna in a hla thu  
tidanglam lovin an sa leh ta  
a. He hla hi Billboard Hot 100  
ah 43-na a ni pha hial a ni.

Darlene Zschech hi 1965  
khan Brisbane, Queensland

Australia ah an unau zinga a upa ber ni turin a lo piang a. Music a thanlen pui a, a ngaina em em bawk. Mc Donalds, KFC leh Coca Cola te tana fakna hla siam leh sa in bul a tan a. Kum 15 mi a nihin, a pa, a ngaihsan em em leh Kristian tha tak chuan thalai pawl – ‘Royal Rangers’ te’n camping an siamah a hruai a. Kar tlemte chhungin thil chi hrang hrang bakah Lal Isua Krista chanchin an zir a. Chu camping a tang chuan a lal leh chhandamtu atan a lo pawm ve ta a ni. Chumi nia a inhlanna chu *“the most beautiful prayer I have ever prayed”* tiin a sawi hial a ni.

Kum 1993 chho ah chuan a nunah hun khirh tak a tawng chho ta . Kum 28 mi tan chuan chhiah pek tur inthuah tup tup kara ei zawn chu harsa a ti em em a. Pathianah chauh loh chuan hahdamna a awmlo tih hriain, Pathian hnenah beidawng takin a tlulut a. Sam 96-na chhiara, ngaihtuah pahin kum 5 mi lek a nih laia a nu leh pa te’n piano an leisak chu a han hmet kual vel a. Chutah chuan a ni, Sam 96-na a chhiar a tang chuan, a thinlungah hla thu a lo luang lut ta. A sa tan

nghal mawlh mawlh a, a sa nawn tluk tluk bawk. Chutia a han sa chu a rilrua thawpikna leh beidawnna zawng zawng chu bovin, Pathiana a lawmna leh a rinna chu sawh nghehin a lo awm thar a. “Ka Lal Isu, ka Chhandamtu, nang ang reng tumah an awm lo” tiin a phuah chhuak ta a ni.

Amaherawhchu, mi zakzum ve tak a nih avangin midang hriata han sak chhuah mai a huphurh deuh a. An kohhran music director leh a thianpa te chu bang lam hawi turin a hrilh te te a, an hriatah a hla thar chu a sa ve chauh a ni. A sak chhung zawng chuan thlanin a bual vek a, a kutzungtangte chu a nal avangin a hmeh soal a hlau em em mai a. A zai zawh chuan a ngaithlatute chu an lo hawi a, chu hla chu ropui an tih thu an hrilh takah chuan Darlene pawh chuan Pathianin a pek ni ngeiin a pawm ta a ni.

*“Chawimawina leh ropuina a hmaah an awm a;  
Chakna leh mawina chu a hmun thianghlimah an awm”*

Sam 96 : 6



*Hriselna*

# Rannung Seh - Scrub Typhus


*Dr. Pachuau Lalmaisauma*

**K**hawvel pumpuiah rannung seh natna hi kumtin mi naktaduaih khat velin an vei thin a, enkawlina mumal pek nghal loh damlo za-a-sawmthum velin an thihpui thin a chhut a ni.

Khawvel ram thenkhat chu Scrub Typhus natna hian englai pawhin pawha, a chenchilh avangin a khaikhawmna hming atan "Tsutsugamushi Triangle" tih an put tir nghe n g h e . Southeastern Asia , Islands of south west Pacific, coastal Queensland, Japan leh India ram pawh he triangle chhungah hian an awm. Rannung seh natna hi Himalaya tlang bul thut, Jammu atanga Nagaland te, Himachal Pradesh, Sikkim leh Darjeeling-ah te chuan thil thar a ni lo.

**Mizoram dinmun**  
Orientia tsutsugamushi  
natna hrik vanga lo awm

### World Scenario: Triangle of Scrub Typhus/Rural Typhus



Parag Sharma, Rakesh Kakkar, Shipu. N. Koore, Vijay. K. Yadav, Raj Sharma. Geographical Distribution, Effect of Season & Life Cycle of Scrub Typhus.

Scrub typhus (Rannung seh natna) vang hian Mizoram-ah mi 42 lain nunna hlu tak an lo chan tawh a, January (2019) thleng khan damlo chhinchhiah zat hi 3301 lai an ni. Ripawt kim loh leh



hriat chhuah loh phei chu thi leh damlo zat tarlan ai hian tam fe tura ngaih a ni.

Tun hma khan Scrub Typhus hi Mizoramah kan hmel hriat ngai meuh lo. Tunah erawh hmun hrang h r a n g a h mipui ti ralkheltu ber pakhat a lo ni ta! Kum 2005


aṭanga khan khaw sawm aia tamah he hri hi a leng tawh a. Mizoram hmun hrang hrangah he natna hi hmuh belh a ni zela, kumtluanin he natna hian min chenchilh reng a ni.

**A natna thlentu hrik**

Rannung seh natna thlentu hrik (Orientia tsutsugamushi) hi timur chhunga awm chi (intracellular) Gram negative bacteria an ni a; kum 1899 khan Japan ramah Chiang taka hmuhchhuah a ni. Heng hrikte hi an te hle (0.2-0.4mm). He hrik hi rannung chi khat, tuhrik in sazu aṭanga kaiin chu tuhrik chuan mi a seh in a theh darh ta thin a ni.

**A hrik theh darh a nih dan**

Scrub Typhus hrik hi tuhrik leh sazu lam chi (Rodents) te'n an in kai



chhawng fo thin a. S a z u pang a b e t tuhrikin he hrik (Orientia tsutsugamushi) hi an pai

a, mihring an seh in mihringah hrik chu an hnutchhiah a, mihring taksa a bu an khuar hnuin he natna hi a lo awm ta thin a ni.

Tuhrik ho hian an dam chung (life cycle) ah hun bi pali (Egg -Larva-Nymph - Adult stages) paltlang mah se, Larva an nih lai chauhvin Scrub typhus natna hi an thlen a. Larva stage piah lam Nymph leh Adult stage-ah chuan mi an seh ve tawh meuh lo. Chutih laiin chhuan sawmnhihna thlengin a hrik hi an inhlam chhawng ngat ngat thei thung !

Scrub typhus natna hrikte hian inthlahpun nan leh than

puitlin nan sazu lam chiho an hman a. Sazu (rodents) chi hrang hrangin pai thei mah se, a natna hi an tuar ve kher lo. Mizoramah hian chepa ah pawh he natna hrik hi hmuh a ni. Heng sazute aţang hian tuhrik in natna hrik chu lachhawngin mihringah an thehdarh ta ťhin a ni. Scrub Typhus natna hrik pu darhtu tuhrikte hi an te hle a, mit lawnga hmuh mai pawh harsa tak a ni.

### **Scrub typhus natna lan chhuah dan**

Scrub typhus natna hrik thehdarhtu bik tuhrikin mi a seh aţanga ni 10-12 chhungin a natna hi a lo lang chhuak ber ťhin. Tuhrik dang ang lo takin heng tuhrik seh hi a na hran lova, thak bawl angin a lang chhuak ťhin. Mihring taksaah vun nem lai deuh - nghawng, kap, zakhnuai te hi a seh duhna lai deuh bik an ni.

A chang chuan tuhrik sehnaah khan hmuam hma (eschar) pankhir a lo awm ťhin. Hei hi rannung seh natna fin fiah nan ťangkai ve fo mah se, hmuh tur a tam lem lo. Damlo za a sawmli sawmnga vel chauhah a lan

avangin, in nghah nan hman loh a him zawk. Mizorama rannung seh avanga damlo zingah phei chuan hmuh a ni mang lo.

Scrub typhus avanga damlote hian khawsik leh luna nei ťhinin, an tlun fo baw. Mit leh a bul vela sen deuh rum te, hnungzangah thakbawl te pawh a awm thei a. Heng bakah hian tihrawl na, pumna leh ťhalťhohte a awm ve ťhin. He natna hi a lo punlun zel chuan thisen zam chat leh a kaihnawih thil ťha lo dang a awm thei baw. Tin, Scrub typhus hian pneumonia leh thawkna lama harsatna dang a thlen thei baw.

### **Natna enfiahna (test) lam**

He natna hi thisen test aţanga enfiah theih niin, Rapid Diagnostic Kit (RDK) hi hmun kilkhawr berah pawh hman a rem chang hle. Wel Felix Test te pawh hman ťhin a ni a; chian leh zualna turin RT-PCR leh ELISA test te hman a ni.

### **In enkawlna lam**

Scrub typhus natna hi hriat chhuah hma chuan antibiotic damdawi hmanga

enkawl dam mai theih a ni. Damdawi hman lar tak chu Doxycycline niin naupang leh nu naupaite chu Azithromycin a enkawl tur a ni. Scrub Typhus laka invenna (vaccine) hi a la awm lo. Damdawi te hi mahni thu a lo ei ve ngawt hi a him loh avangin doctor leh damdawi lam thiamte rawn hi a ÷ha ber.


**Tu hrik kai lo tura invenna**

He natna thehdarhtu tuhrik awmduhna hmun a kal hmain hnathawh kawr, taksa khuh tam thei ang chi ber hak tur a ni. Rannung duhloh (insect repellent) damdawi - Odomos, Permethrin, Dibutylphtalate leh a dang te chu taksa lang laiah ram chhuah dawnin in chulh ÷hin tur a ni. Hnim leh phulah engmah phah lova ÷hut mai mai loh tur a ni. Tin,

in leh a vel fai taka vawn reng hian nasa takin min veng thei bawk a ni. A hluarna hmun ngei ni a hriatah rannung thahna hlo (insecticides) kah a ÷angkai hle.

**Tlangkawmna**

Rannung seh natna hi tute pawhin kan neih theih avangin hriat chian a ÷ul hle. In enkawl hma chuan awlsam te a dam mai theih a nih laiin, ngaihthah a in enkawl har erawh chuan thihpui mai theih a ni thung! Mizorama rannung seh (Scrub Typhus) natna avanga thi ÷henkhat hi chu in enkawl na an dawn har lutuk vang ni berin a lang. Kan nawmsam loh leh dam loh hlekah in enkawl na dik a hun taka dawng thei turin damdawi thiamte pan thuai a ÷ul thu hi uar takin i in zirtir zel ang u.



## **HUAITUTE CHANCHIN**

### **T.Upa David Lalhmachhuana**

*Committee Member*

Pu David Lalhmachhuana hi Pu C. Hualkunga leh Pi Nemchhingi te fa pahnihna ni turin March 6, 1980 khan Chaltlang Lily Vengah a lo piang a, pianpui hmeichhia 2 leh Mipa 1 a nei. Kum 2017 November 2 khan apa Pu C. Hualkunga hian chatuan ram alo pansan tawh a. Kum 2008 March 14 khan Ramluahthangi nen inneiin tunah hian Chaltlang, Lily Vengah an cheng mek a ni.

Zirna lamah Chaltlang Primary School III ah bul a tan a, Hrangbana College atangin Kum 2002 khan a Graduate a ni.

Pu Davida/Adea hi Naupan lai atanga Kohhran bel tlat mi a ni a. Pathian khaw ngaihna a zarah Kum 1999 atang khan vawiin thlengin chawl lovin Sunday School Zirtirtu rawngbawl hna ala chelh ta zel a ni.

KTP rawngbawl na lamah chuan Group-ah bul tanin,



kum 2002 atangin Branch Committee member-ah a lut a, kum 2004 atang khan Branch Office Bearer's post hrang hrang chelhin, tun

thleng hian ala awm ve ta zel a ni. Kohhran Zaipawl leh Bial Zaipawlah conductor-te lo ni ve tawhin, bial KṚP rawngbawl naah Fin. Secy, Asst. Leader leh Leader nihna alo chelh ve tawh bawk. Kum 2018 KṚP general Conference West Phaileng a neihah khan CKṚP committee member atan thlan tlin a ni ta a ni.

Tunah hian Kohhranah Thuhritlu, Sunday School Committee member, Kohhran Light & Sound Committee, Kristian chhungkaw committee, Chaltlang Pastor Bial KṚP Leader, Lily Veng Branch KṚP Leader leh Senior Deptt. Leader chanvo te a chelh mek a, February 24, 2019 khan

Tualchhung Upa a tan thlan tlin a ni nghe nghe a ni.

Pathian hlaah hian KHB No.433 ' Ka chhandamtu min vengin a hnai reng' tih hi a duh hle a, Pathian thuah Sam 37:5' I awmdan tur chu Lalpa chungah nghat la, amah chu ring la, aman a ti vek ang', tih leh Sam 73:28 ' Kei atan erawh zawng Pathian hnaih hi a ðha a ni' tih hi a duh leh a inngahna ber a ni.

Pathian khawngaihna avanga chhandam kan ni tih in hria a, kan awmdan tinrengah amah ðih tlat chungah Pathian leh Kohhran tana rinawm tlat turin min chah bawk a ni.

*Helaia KS ni awm tak hi,  
 Tu emaw farnu duhtak a ni a sin.  
 Kha laia rukru chimawm tak kha,  
 Tu emaw tupa duat em em a sin.  
 Kha lai hmuna buaina siam kha,  
 Tu emaw nuta neih chhun a ni a sin.  
 Khi ta OD i hmuh tlangval/nula khi,  
 Tu emaw chhungte an ni a sin.  
 I chanah han dah ve teh an chhungte chan hi?  
 An tap thin, an zak, an beisei, an beidawng, an tawngtai.  
 Tumah hi soal tura piang an ni bik lo,  
 Soal bumna avangin an tang mek a ni.  
 Hawh u, an mahni haw mai lo in,  
 Chhanchhuak turin i tangrual ang u.  
 Keini lo tunge awm chuang le.*

*~Mami Fanai, Mission Veng~*





*" Tin, Adama chuan, "Mi awmpui tûra hmeichhe mi pêk ngei khân thing rah chu mi pe a, ka ei ta a ni," a ti a."- Genesis 3:12*

TUNGE ? : Tunlai kan ram nunphung han thlir kual vel hian Pawl, mimal leh a huho, roreltute chenin, kan thawm kan au aw aţang hi chuan tute mai pawh hian kan ram hi nuam kan tilo hle a nih dawn hi tih mai tura phun ri, vui ri, in demna awka a tam hle mai, kan ri nuaih nuaih a ni ber e. Mihring leh mihringah in teh tlin te, mifel famkim nihte hi thil harsa tak ava ni em! Kan ram, kan nun, kan kawng, kan hnam, kohhran thlengin a chhia/a diklo/a kal soal kan ti a kan au a, tunge a tisualtu ber chu ni ta le? Tuman katih/keimah vang, kan ti tawh lova, chumi/khami vang kha alawm kan inti tawn a, kan in puh tawn a, insiam ţha tur bik reng kan awmlô tihna a ni ber awm e. Mihring siam hmasak ber Evi leh Adama te hunlai zia kan thlah thei meuh lo chu a nih hi maw !!

TEHTU : Kan ram a chhiat chhan, kan nun a chhiat chhan, kan kal dan a soal chhan tehnaah, tehtu nih vek kan tuma, kan inteh fel thei chuang hlei lova, kan buai ta nuaih a ni ber a, tehtu chu teh letin a awm a, alo fel thlup leh bik silo thin nen, kan tlinglo ta fur hlawm mai a, tehna hmanga tlingzo chauh tehtu tura kan phût a nih pheih chuan mihringah tlingzo reng an awm dawnlo a ni, chuti a nih si chuan tunge tehtu atan kan hman tak ang? Tunge tlingzo ang tih lamah i hawi thut teh ang u. Adamate aţangin Evi chu a bultumtu a ni a, Evi chuan Rul (setana) a puh leh bawk si, in puh in puhtawn mah se tumah fel ber, him pial tur bik an awmlô, an inpuhtawwna in eng thil ţha leh thutawp mumal mah a hring chhuaklo. Mumal taka tehtu diktak leh roreltu chu

PATHIAN chauh a ni a, AMAH chauh chu tha leh thalo teh tura tlingzo awm chhun a chu alo ni reng mai. Nang leh Kei hi tehtu niloin, teh tur a zawk chu kan ni tih kan in pawmthlap a pawimawh ta ber a nih chu, chuti nilo a kan inteh ve vak vak a, kan inchhiar ve a, kan in puantawnaah hian inremna, muanna leh ram nuam, nun nuam siam a har em mai, in huatna leh inbeihna, indona bak kan hringchhuak thino chu anih ber tak hi.

TLINGLO TLING :Eden huan a inpuhtawnaah tunge thil fello awm laka fihlim bik tih tehtu Pathian tehna atangin Adama, Evi, Rul(setana) tumah tlingzo reng an awmlo, Lalpa anchhia an dawng ta vek a. PATHIAN ngaidan leh duh dan lam inteh tir a, inthlirtirna tlang atang hlei hlei hian fel famkim alo har lehzual a, tlingzo lo thiau awmkhawm mai chauh kan ni e tih bak sawi tur a awmlo, churang chuan ka diklo a ni/ka tisuul a ni ti a midang nilo mahni zel insiamthathna thawh char char a pawimawh ta hle dawn a ni, midang ringawt puhmawh leh dema insiamthattir tumnaah Pathian

atangin thiam channa leh hlawkna dawn tur a awm ngailo vang, chumai bakah siamthat tur neilo, fel chuang silo mi laklawh, phunchiar bawk si awmkhawmin hahtlak takin dam chung tawite hi kan hmangral vel mai mai hlawm ang tih pawh a hlauhawm a ni. Chung zawng zawng piahah chuan thildang ala awm; kan fel lohna leh diklohna, kan sualna zawng zawng avanga mi tlinglo kan tinna tur; khawngaihna leh hmangaih na avanga kan chan, thilpek ropui tak kan lo nei reng mai tih hi. Pathianin kan tlin zawhlohna teh tlin hram anih theih nan, tehna rualin "TLINGLO TLINNA" min pe, a makin a ropui takzet, chu mi tlingzo kan sawia chu, kan tan liau liau a lokal LAL ISUA ngei kha a ni e. Ama hming avangin kan tling a, amah avangin mifelah chhiar kan ni a, chumi hriaa tlinglo tinna pawmtu KRISTIAN chuan tlinloh luih zel a tum a rem tawhlo, Isuan min thawhsak tawh tihve tur kan nei tawhlo ti a, thawveng taka felloh, nawmchen leh thil thalo tih luih pawh tih lohna chu tlinga puan chung a tlinloh leh theihna kawng a

ni tih i hrereng ang u. AMAH ISUA avangin, PATHIAN min duh dan leh a thu zir chiangin, kan fellohna leh diklohna mahni leh mahni in chhut fo ila, siamthah ngai leh thawh ngai a awm a nih pawhin MIDANG nilo KEIMAHNI zawk zel insiamtha a, thawh ngai thawkin, a duh dan zelin nun hmang ila, AMA zarah ngei chuan mifello hi felah puan kan la ni ve ang a, he leiah a hruaina thlamuanthlak tak kan dawng ngei ngei ang. Chumi piah lam rorelnaah pawh, hemi hi mi tenawm leh misual tia hekna hrang hrang hmang a "a tlinglo a ni" min tihna karah, mahni ngei pawh tlinglo inti leh inthlahrung taka kan awm laiin, kan aiawh Lal hmaa ding, kan zui Isua

ngei chuan "Heng mite hi ka thisena ka lei, an sualna pawh tlenfai tawh, ka thu ringa pawmtu an ni a, ka hnena awm tur an ni e" tiin kan chungchang thu a sawifiah ang a, tlingah puan kan la nive ang, chutih hun chuan lawma vangin he leia ringtu tuarna lo nep zia hi kan la hmu let ngei bawh ang.

A tawp nan zawhna siamtha leh teh ang, Tunge tlingzo? Adama'n a thiam chan nan "mi awmpui tura mi pek "tiin Evi a puh a, thiam a chang zo lo, keini erawh chuan heti hian kan chhang ang, "min chhandam tura min pek Isua ngei kha" tiin chhuang takin kan tinna kan puang tur a ni. Nang leh kei mifel famkimlo tak mai hi Isua zui turin kan tling tawh a ni.

Trinidad rama an rorelna hmunah chuan Trade Union a an pawl hotu pakhat chuan darkar 4 leh a chanve teh meuh mai thu a sawi a. A sawi zawh chuan an counsellor pakhat chu lo ding chhuakin, a ning lutuk chuan speaker hnenah " Ka pu, tuna thusawitu ang chiah khan kei pawhin engmah sawi tur ka nei lo," a ti a, a thu leh ta ringawt a.

*"Mahni lam tui avanga rei tak thu sawi chiam mai hi a ngaihla tute'n an hlawokpui phah fo lem lo"*

# NGAIHNAWM NGAIHAWM



**9774196355**

## *Darthlang*

*R. Vanlalduanga, New Sachan Branch*

**M**izoram thalaite, khawvel changkanna leh sualna thlipuiin min nuai mek laiin, Kristian Thalai Pawl lo awm hian Zoram dung leh vanga thalaite min phuar khawm a. Selna anka leng vel karah Rev. O.W. Owen, sualna do let tura pawl ropui tak, KṚP ilo din hi i tusual mawlh lo e. Thupui atana 'Rawngbawl tura chhandam' han tih hnap mai hi a mawi mang e aw! Mahse, chhiar liam mai atan erawh a nih hmeh chiah loh. I chhiar zawh rual chiaha nangmaha mawhphurhna hna lo lang kha i hlen chhuah a ngai. Kan thupui hi 'Rawngbawl sak tura chhandam' tih a ni tlat lo.

### **A chhan chu maw...**

Khawthlang tuipui ral leh lam, Bangladesh ramri dep atang hian keini, New Sachan Branch-te pawh hian intih dan, in chet vel dan zawng zawng te hi 'Darthlang' atan kan lo hmang ve che u a sin. Inkhawm pawh thawhtanni zan bikim la chhiar thei chiah lo mah ila, kan inkhawm tumah chuan nuam kan tiin, chhimtu tap thlem ngai pawh kan awm tawh bik lo va,

ṭawngkam chauhin a inkhap ve theih tawh a nia. Ṭan hun erawh chairman mitko san deuh ak hun nghah ala ngai tlat, a chhan chu a inkhawm awm mi kan kim leh kim loh hmu Chiang bertu a ni tlat.

### **Hruaitu thar – post by post**

Kum lo tharin a ken tel, hnah hlui an ṭil a, hnah tharin a thlak ṭhin tih pawh hnah hlui a vuai deuh san hnuah chuan a hriat loh theih bik

nang. Post by post-in em ni ang? Mi sawm vel zinga a tam zawkin mahni hming pawh an ziah thiam si loh chuan paper leh pen nen pawh ni se eng post mah a thlan theih loh chu a ni der mai. Engtin nge ni ta ang le? Post by post chu 'ka chhang' ngatin a ngai ta. Tawngtheilo kan awm lo hlauh. Leader ațanga member-te'n kan duh kan han sawi diat diat chuan vote hmu tam ber chu alo chhuak ve mai; vote chhiar a ngai ve lo. Result kan puang a ni nghal zel mai. Kumtin O.B kimin kan la thlang ve thei zel a nia.

### **Baptisma chang tur kha...**

Vawikhat inkhawma Baptisma chhawng thum chu sawi tur a tam bik lo ngawt ang. Inkhawm țin dar a ri a, Bialtu Pastor a ding tawh, Baptisma chang tura hming pe thlap tawhte hmel a la lang kim tlat lo. Khaw'nge Baptisma chang tur pakhat? 'T.V. a en'. Va ko vat r'u, pakhat pawh ala kim chuang lo, khawiah nge? 'A leng'. Rang deuhin va ko r'u, KTP member tur lehngal, Pathianni a theihngilh leh ta a ni maw? Inkhawm ban dawn meuh chuan alo thleng


ve ta hram a. Nikum chung khan Buddhist thalai pathum laiin Kristian Thalai ni tawh turin Baptisma an chang nghe nghe a sin.

### **Ka lawm e...**

Kan vela ringlo mite hian ținwngkam mawi leh awm dan mawi an lo la hre lo hle mai. KTP member-te'n 'ka lawm e' tih ținwngkam an hmang leh inchhung khura an danglamna te, ținante (ringlo) zingah pawh an danglamna hmuh tur tam tak awm hian KTP hlutzia min hriat chhuah tir țin.

A hming pawh i vawikhat hriatna ni hial tur, New Sachan Branch-ah hian nikum khan member 16 kan awm a, kuminah erawh 26, mipa 20 leh hmeichhia 6 lai kan ni ve tawh a sin! In group ținena group khat zat kha chu Pathian zarah kan larawn kai ve thuai ang. Theih tawp kanrawn chhuah zel dawn e.

Ka member-pui duh tak, nang leh KTP hi pawl mai ni lovin, nun phung leh awm dan mawi midangte entawn tur leh zirtirtu 'DARTHLALANG' i lo nih reng hi le!!



**K**ṬP Rorel Inkhawm wawi 8-na chu March 1-3, 2019 chhung kṣan Tuikual North Kohhran Biak Inah tuangtaka hman a ni. KṬP Rorel Inkhawm hi kum 2005 aṅang kṣan KṬP General Conference awm loh kumah neih ṭhin a ni a.

March 1, Zirtawpni zanaḥ Palai lawm leh Report inkhawm hun hman a ni a. CKṬP hmalakna hrang hrang, Bial leh Branch hrang hrang dinhmun leh chetvelna ngaihthlak a ni a. Inkhawm percentage tla hniam zel leh member mipa, hmeichhia aia thi kan tam lutuk chuan ngaihtuahna a ti thui hle. He mi zan hian Rev. K. Lalrinmawia, Executive Secy., i/c KṬP in Kum 2019-2020 Kumpuan Thupui 'Kristian Nun – Takna' hawn leh hlanna a nei bawk.

March 2, Inrinni chawhma dar 10 atangin rorel ṭan a ni a, rorel hi Rev. Dr. K. Lallawmzuala, Leader, CKṬP in a kaihruai a, tlai dar 5 rik hma hretin rorel zawh a ni. Rorel naah hian Palai 901 leh chhimtu 4 an kal thei nghe a, a thlengtu kohhran

te'n Rorel Palaite tana ruai an buatsaih chu hlim taka ṭehho a ni bawk.

Rorel Inkhawm Wawi 9-na chu Chaltlang Kohhranah March 5-7, 2021 chhungin neih a ni ang.

#### **Thurel tlangpui te :**

1. YRC budget a ngaia kalpui leh ni rawh se.
2. YRC pualin KṬP vawikhat inkhawm thawhlawm lak khawm leh ni rawh se.
3. Thupui zir leh ni rawh se. *(CKṬP Committee-in thupui chhawpchhuah sa aṅangin lo thlang rawh se tih a ni)*
4. KṬP inkhawm vawikhat thawhlawm hi Synod Hospital Charity Fund puala lak khawm ni rawh se.
5. Chhawmdawlna pualin KṬP inkhawm vawikhat thawhlawm lak khawm ni rawh se.

6. Kum 2019 chungin CKṚP-in ruihhlo ngaite pualin rampum huap ṭawngṭai rual buatsaih leh rawh se.

7. HIV/AIDS laka kan him zawk nan poster/billboard tar leh awareness campaign neih ni rawh se.

8. Ṭhalaite zingah Print Media-in ngaihhlut a hlawh leh zual theih nan CKṚP-in hma la rawh se.

9. CKṚP-in ram leh hnam, ṭawng humhalh leh vawn him a nih zel theih nan hma la rawh se.

10. CKṚP hmalaknain Chhim bial huap Musical Meet neih ni rawh se.

11. Kum 2020-2021 kumpuan thupui atan 'Pathian hnaih' (Jak 4:8) thlan a ni.

12. Kum 2019-2020 CKṚP budget atan Rs 69,26,000 pawm a ni.

March 2, Inrinni zan Pathian biak inkhawm neih a ni a, Rev. R. Lalhmingthanga, Synod Moderator hnen aṭangin Pathian thuchah ngaihthlak a ni. Inkhawm banah fellowship hun hlimawm tak hman a ni bawk.

March 3, Pathianni Chawhma inkhawmah Upa Rosangliana, CKṚP Asst.

Leader hnen aṭangin Pathian thuchah ngaihthlak a ni. Tin, chawhnu Pathian biak inkhawmah Rev. B. Sangthanga, Executive Secretary-in Pathian thuchah a sawi thung.

Pathianni zan inkhawmah Rev. Dr. K. Lallawmzuala, CKṚP Leader hnen aṭangin Pathian thuchah ngaihthlak a ni a, Inkhawm banah Fellowship hun nuam tak hman a ni a, hetah hian kumpuan thupui hmanga movie clip insiamsiak result puanna leh lawmman semna hun hman a ni bawk. Intihsiakah hian Champhai Bethel bial siam 'El dorado' tih chu pakhatna a ni a, pahnihna chu Bungkawm bial niin pathumna erawh Tanhril bial an ni thung.

Kil tinah a thlengtu kohhran inbuatsaihna a nasain, an inpekna leh ṭanrualna zawng zawngte hmuh hmaih theih a ni lo. A ropuiin fak an phu tak zet a ni. Zai hruai hi a thlengtu kut a nih angin theih tawpin an inbuatsaih a, hei hian inkhawmpui boruak pawh a ti nuama, zai a nuamin a khamawm loh ṭhin hle.





# KANTU

## College Veng Branch Kolasib

**K**TP College Veng Branch, Kolasib hi May 1, 2006 khan din a ni a; tunah hian Member mipa 170 leh hmeichhia 129, kan vaiin member 299 kan awm mek a ni. College Veng hi Diakkawn Pastor Bial chhunga awm niin Diakkawn Pastor Bial-ah hian Kohhran pahnih leh Branch Church pakhat kan awm mek a ni.

Kuminah hian Branch Committee mipa 9 leh hmeichhia 7 awmin Branch O.B, Ex-Officio-te nen kan vaiin Committee Member 24 kan awm. Branch hian Committee hun nghet neiin thlatin Ningani hnuhnung ber dawttu, Kohhran Committee khalhin kan nei thin.

Kum 2019 atan Group pali heng - Hosea, Joela, Amosa leh Jona Group-ah te inthenin Group-te hian kum khat chhung atan Budget Rs 13,000/- theuh an nei a; Branch Committee chuan group hrang hrangte intihchak tawinna tur leh inpawh zawka rawng kan bawlho theih nan intihsiakna

chi hrang hrang - Inkhawm leh Fellowship kal tam te, Bible leh Kristian Hlabu ken te, Singing Competition te leh Indoor leh Outdoor Sports hmangte in inelna a buatsaih thin a ni.

Kum 2019 chhungin Branch Committee chuan Biak In puala sum dah te, Work Camp kalte leh Sound System thuam thatte project atan a thlang a, Branch suamtuakna tlangpui chu - Slab chhun, Blanket suk, huan sam, Sangha zawrh te bakah Faith Promise hmangin sum kan tuak thin a ni.

Sub. Committee hrang hrang - Programme Committee, Literature &

Documentation Sub-Committee, Evangelical Sub-Committee leh Refreshment Sub-Committee te din a ni a; Evangelical Sub-Committee te hmalakna hian Member ruihhlo ngaite pualin Programme hlimawm zawk buatsaih te, Member hlate puala chawngheia tawngtai hunte hman thin a ni a, member Biak In thleng phalote an in lamah lenchilhin hun hmanpui an ni bawк thin.

Thawhtanni zan inkhawm hi sermon leh thupui zir ho nan te, Special Night hman nante kan hmang ber a, Pathian ni tlai Fellowship Kohhran Hall leh in lamah kan hmang thin a, Fellowship ah hian zaiho te, hla zir nan te leh thu tawi sawina hun atan kan hmang bawк thin.

Kan branch hian Missionry 7 kan chawm mek a, tun

dinhmunah hian kan Member Missioanry-a kal mek pali(4)kan nei a ni. Central atanga tihur hrang hrang lo kal, Booklet zir te, kum puan thupui zirte kan tihlawhtling thei a, Member Biak In hawnga innei an awm chuan thuziak leh Rs 1000/- Branch hminga hlan thin an ni.


Pathianni apiangin Branch Chanchinbu - PENIEL tihchhuah thin a ni a; kohhran hovin kan hlutin, kohhran chanchin inhriat tawn nan ber kan hmang a, Branch chanchinbu hi kan Kohhran atanga Missioanry chhuak mekte hnenah kar tin thawn thin a ni. Kristian Thalai Chanchinbu Copy 108 lak a ni bawк.

Branch KTP hmingin Huan ram lei a ni a; sum chang thlai chin tumin tunah hian kan in buatsaih mek bawк a ni.

### *April Kristian Thalai Issue*

*Cover Photo : Dr. David C. Vanlalfakawma*

*Cover Design : Ev. Lalfakawma, Ramhlun North*



## HRINGLANG TLÁNG

### *College Test*

**T**hawhtanni a Test tur an ni a. Mahse an thian thum chuan lehkha zir aiin theuleu chakna chuan a tur ut ut mai si a. Pathianni zan Party pheii chu a pui dawn hle mai a. An kal chak bawk si, lehkha zir ngai bawk si, an rilru a hah em em a. Tih dan hrang hrang an dap hnu chuan, Test loh dan chu an ngaihtuah chhuak ta a.

An ruahmanna chu hetiang hi a ni. "Sunday zan khan an zinga pakhat chhungte chu thiin, a ruang an khaw lamah an zui ve a. Thawhtan tuka test ngei tuma an rawn haw chu, khawkar kawngah an motor ke a chhe/puncture hlauh mai a. Chuvang chuan test pawh nei ve hman lovin, chawhnu lamah an rawn thleng thei chauh a ni. Test pawh hun remchang hmasa bera nei turin an ngen mai dawn a ni".

An ruahman ang tak chuan Principal bulah chuan an sawi a. Principal fel tak mai chuan an dinhmun chu alo hre thiam a. Test pawh a tuk a nei turin a phalsak a.

Principal an bum thei chu an lawm em em a. Test lo pal tlang tawh an thiante bulah chuan an test a, zawhna lo chhuakte an zawt a. Zawhna ngai chiah chhuah leh beiseiin an inbuatsaih a.

Test ni a lo thlen chuan, an thian thum chu room hran theuhah an thut tir a. Zawhna chu hei hi a ni.

- 1) Hming \_\_\_\_\_  
(1 Mark)
- 2) Motor chu a khawi lam ke nge puncture? \_\_\_\_\_  
(99 Marks)

Options –

- (a) A ke hma vei lam
- (b) A ke hma dinglam
- (c) A hnung vei lam
- (d) A hnung dinglam.

# Keimahni



## YRC PUALIN KṬP SIHFA BIALIN RS. 4,000 AN PE

Kristian Ṭhalai Pawl Sihfa Pastor Bial chuan YRC sakna a tan a ṭul ang anga hman turin Rs. 4,000/- an pe a. A lawmawm hle mai.

## RANGMEN BRANCH ṬHIAT

KṬP Rangmen Branch chu member-te hmun danga lehkhazira an awm bo vek avangin member an awm rih lo a, chuang chuan tun atan rih chuan ṭhiat a nih thu hriattirna kan dawng.

## NEICCYA-A BIAL ZAIPAWL KAL TUR

May 17-19, 2019 chhunga Gossaigaon, Kokrajhar, Assam-a NEICCYA 18th Biennial Conference neih turah Synod Choir an kal theih dawn loh avangin Sihphir Pastor Bial Zaipawl te kal tura ngen an nih ang in an kal thung ang.

## EYEP-A KAL PHAL THU

Taiwan-a Ecumenical Youth Exchange Programme-a kal turin Synod OM chuan Synod sensoin mi 3 leh mahni sensoin mi 2 kal min phalsak.

## NEICCYA 19TH BIENNIEL CONFERENCE THLEN DILNA

North East India Christian Council Youth Assembly 19th Biennial Conference, kum 2021 thlen dilna chungchang chu Synod OM chuan Synod Executive Committee-ah thlen phawt ni se tiin a rel.

## PYJC TRIENNIEL CONFERENCE-AH SYNFO CREW

Presbyterian Youth Joint Committee-in Khampat, Myanmar-a May 3-5, 2019 chhunga Triennial Conference an neih turah kan dil angin OM chuan Synfo Crew pakhat hruai tel ve a rem ti. Hei hi rawngbawlna member te'n an lo chhim ve theih nan a tih a ni.

## KṬP DAY PUALIN LEADER THUCHAH TICHHUAK

February 16, 2019-a KṬP Day pualin CKṬP Leader, Rev. Dr. K. Lallawmzuala chuan thuchah video clip siamin, Central KṬP Youtube Channel, CKṬP Facebook Page leh social media hrang hrangah te thehdarh a ni.

**HRUAITUTE CHHUAHNA  
KṮP, Dawrpui Vengthar Pastor  
Bial Golden Jubilee**

KṮP, Dawrpui Vengthar Pastor Bial chuan January 25, 2019 khan kum 50 an tlin, Golden Jubilee an lawm a. CKṮP aiawhin Pu K. Lalengzama leh Pu Rorelkima te an kal a, lawmpuina thilpek an pe.

**Rengdil Bial KṮP Conference**

Jan. 25-27, 2019 chhungkhan KṮP, Rengdil Pastor Bial chuan Rengdil Kohhran Biak Inah Conference an hmang a, T.Upa Rochungnunga, G.S, CKṮP chu speaker niin hun a hmanpui.

**Zawlpui Bial KṮP Conference**

Jan. 25-27, 2019 chhungkhan KṮP, Zawlpui Pastor Bial chuan Putlungasih Kohhran Biak Inah Conference an hmang a, Upa Rosangliana, CKṮP Asst. Leader chuan hun a hmanpui.

**Thenzawl Bial KṮP Conference**

Thenzawl Bial KṮP chuan Jan. 25 - 27, 2019 chhungkhan Conference Wawi 50-na leh Golden Jubilee hmangin an lawma, CKṮP aiawhin Dr. David C. Vanlalfakawma a kal. CKṮP hmingin lawmpuina pek an ni.

**Bungtlang S Bial KṮP  
Conference**

Jan. 25 - 27, 2019 chhungkhan KṮP, Bungtlang S Pastor Bial Conference wawi 30-na chu Bungtlang S Kohhranah hman a ni a, Tv. Benjamin Lalnunpuia leh Pu Malsawmtluanga,

Committee Member ten an hmanpui.

**Phuldungsei Bial KṮP  
Conference**

Jan. 25-27, 2019 chhungkhan Kristian Ṯhalai Pawl Phuldungsei Bial chuan Phuldungsei Kohhran Biak Inah Conference wawi 40-na an hmanga, T.Upa Lalmuanawma, Fin. Secretary in a hmanpui a, Tv. B. Lalbiakkima, Kulikawn Vengthlang chuan zaia rawngbawl na a nei bawk.

**Sangau Bial Conference**

KṮP, Sangau Pastor Bial chuan Jan. 25-27, 2019 chhungkhan Bial Conference Wawi 22-na an hmang a, T. Upa Lalrinmawia Ralte leh Pu R. Lalbiakmawia, Committee Member ve ve te'n an hmanpui.

**Sihfa Bial Conference**

Jan. 25 - 27, 2019 chhungkhan KṮP, Sihfa Pastor Bial Conference wawi 16-na chu Sihfa Kohhranah hman a ni a, CKṮP te hmanpui tura min sawm angin T.Upa Lalsiammawia Pachuau leh Tv. K. Lalchhanhima, Comt. Member ve ve te an kal.

**Darlung Bial KṮP Conference**

January 25-27, 2019 chhungkhan Darlung Bial KṮP Conference hmanpuiin Pu C. Malsawmtluanga leh Pu Lalrinchhana Ralte, Comtt. Member ve vete an kal.

**Suangpuilawn Bial KṚP  
Conference**

Suangpuilawn Bial KṚP Conference vawi 63-na chu Jan. 25-27, 2019 chhung khan Suangpuilawn Kohhranah hman a ni a, Dr. Lalrotluanga, Treasurer chuan a hmanpui.

**East Lungdar Bial KṚP  
Conference**

East Lungdar Bial KṚP Conference vawi 51-na Jan. 25-27, 2019 chhung khan East Lungdar Kohhran Biak inah hman a ni a, he hunah hian Bial KṚP Golden Jubilee hman tel a ni bawk. Upa Ricky Lalrammawia Ralte chuan a hmanpui. Jubilee lawmpuina thilpek hlan an ni.

**ECM KṚP Inkhawmpui  
hmanpui**

Jan. 31 - Feb 3, 2019 chhung khan Evangelical Church of Maraland Krizyhpa Thyutlia Py chuan (Tuipang) Tipa-ah Inkhawmpui vawi 63-na an hmang a, CKṚP aṅanga Fraternal Delegate intir tura minrawn sawm angin Pu David Lalhmachhuana leh Pu Rorelkima, Comt. Member ve vete an kal. Inkhawmpui lawmpuina Memento pek an ni.

**MṚKṚP Inkhawmpui hmanpui**

Feb. 14-17, 2019 chhung khan Mizoram Ṭhalai Kristian Pawl Inkhawmpui vawi 47-na, Licheng Field, Tlabungah hman a ni a, CKṚP aṅanga Fraternal

Delegate intir tura minrawn sawm angin Upa Ricky Lalrammawia Ralte, Asst. Secretary leh Pu PC. Lalrinsanga, Comt. Member-te an kal. Inkhawmpui lawmpuina Memento pek an ni.

**MIZORAM SYNOD CHOIR  
REPORT**

(JAN. 24 - FEB. 21, 2019)

- a) Hla zir hun : Ṭum 9
- b) Programme neihte
  - 1) Missionary Tirhchhuah Inkhawm-Dawrpui Kohhran
  - 2) Member Inkhawm kim & Zaipawl Night - Chaltlang South Branch KṚP

Heng programme aṅang hian vawi thum din chhuahah hla paruk an sa

- c) February 3, 2019 zan khan Synod Conference Centre-ah Wales kalna tur Visa dilna (Interview) neiha ni a, zanlai dar 12:30-ah an zo thei.

d) Sum report

1) Hmuhna  
~Lawmthu sawina :Rs. 7,000

2) Hmanna

- i) P.O.L. : Rs. 1,700
- ii) Xerox : Rs. 50
- TOTAL : Rs. 1,750

BALANCE : Rs. 5,250



**Kantu : College Veng Branch, Kolasib**

**CENTRAL K.T.P. HRUITUTE 2018-2020**

**Office Bearers**

Leader	: Rev. Dr. K. Lallawmzuala	9402551279
Asst. Leader	: Upa Rosangliana	9612166769
Gen. Secretary	: T.Upa Rochungnunga	9862658082
Asst. Secretary	: Upa Ricky Lalrammawia Ralte	9862387308
Treasurer	: Dr. Lalrotluanga	9436153937
Finance Secretary	: T.Upa Lalmuanawma	9436196515


**Committee Members**

Dr. David C. Vanlalfakawma	9436156561	Tv. Robert Lalduhzuala	9862368012
Pu C. Malsawmtluanga	9862587200	T.Upa Lalsiammawia Pachuau	9862742440
Pu K. Lalengzama	7308187298	Upa K. Lalnuntluanga	8974240614
Pu David Lalmachhuana	8415926838	Pu R. Lalbiakmawia	9612762602
Pu Rorelkima	9862266440	Tv. Benjamin Lalnunpuia	9862306526
Pu Lalrinchhana Ralte	9774365619	Pu P.C. Lalrinsanga	9436144233
Pu Malsawmtluanga	9612588677	T.Upa Lalrinmawia Ralte	9862359884
Pu Lalruatfela	9436705777	Tv. K. Lalchhanhima	9089933771

**Ex-Officio Members**

Rev. R. Lalhmingthanga	- Synod Moderator
Rev. R. Vanlalnghaka	- Synod Secretary (Sr.)
Rev. K. Lalrinmawia	- Executive Secretary i/c KTP





Postal Regn. no. MZR/81/2018-2020  
RNI No. MIZMIZ/2009/29074



**CKTP Committee – KṪP Rorel Inkhawm 2019**



**KṪP Rorel Inkhawm 2019**



**KṪP Rorel Inkhawm 2019 – Hall & Auditorium**

Printed and Published by Rochungnunga, Synod Office, Mission Veng on behalf of Kristan Thalai Fellowship  
Edited by Robert Laiduhzuala and printed at Synod Press, Mission Veng, Aizawl, Mizoram. Copies – 42,000